

四書經注集証

第一函
八冊

孟子卷之五

朱熹集註

萬章章句上

凡九章

萬章問曰舜往于田號泣于旻天何爲其號泣也孟子曰怨慕也

號平聲

更記孟子列傳所如者不合退而與萬章之徒序書詩述仲尼之意作孟子七篇

舜往于田耕歷山時也

路史警瞽御舜以不道舜于是往于田泣旻天號父母負罪隱隱大杖避小杖受

仁覆閔下謂之旻天

爾雅釋天秋爲旻天李巡註秋萬物成熟皆有文章旻文也郭璞註旻猶愍也愍萬物彫落毛傳尊而君之則稱皇天元氣廣大則稱昊天仁覆旻下則稱旻天自上降監則稱上天據遠視之蒼蒼然則稱蒼天按凡集註蓋從毛傳

四書總言集註 卷三
號泣于旻天呼天而泣也事見虞書大禹謨篇

書大禹謨益贊于禹曰帝初于歷山往于田日號泣于旻天子父母負罪引慝祇載見瞽瞍夔夔齊慄瞽亦允若

怨慕怨已之不得其親而思慕也

萬章曰父母愛之喜而不怠父母惡之勞而不怨然則舜怨乎曰
長息問於公明高曰舜往于田則吾既得聞命矣號泣于旻天于
父母則吾不知也公明高曰是非爾所知也夫公明高以孝子之
心爲不若是恕我竭力耕田共爲子職而已矣父母之不我愛於

我何哉

惡去聲夫音扶恕苦八反共平聲

禮祭義父母愛之喜而弗忘父母惡之懼而無怨

長息公明高弟子

本趙岐註

公明高曾子弟子

人物考公明高南武城人趙岐注曾子弟子史記索隱孟子有萬章公明高竝軻之門人

于父母亦音辭言呼父母而泣也。恕無愁之貌。於我何哉。自責不知已有何罪耳。非怨父母也。楊氏曰：非孟子深知舜之心，不能為此言。蓋舜惟恐不順於父母，未嘗自以為孝也。若自以為孝，則非孝矣。

帝使其子九男二女百官牛羊倉廩備以事舜於畎畝之中。天下之士多就之者。帝將胥天下而遷之焉。為不順於父母，如窮人無所歸。為去聲

帝堯也。史記云：二女妻之，以觀其內；九男事之，以觀其外。

書堯典：觀厥刑于二女。釐降二女于嬀汭，嬀于虞。呂氏春秋：堯妻舜以二女。臣以十子。路史：堯之子十長子，監明早死，不得立。庶子九，監明之嗣，封於劉宋，又不肖而弗獲嗣。其後丹房傳鑄，唐冀隨，郇縠，皆云堯後之國。又有虞氏篇，如以盲卽娥皇，姪以瑩，卽女英，以觀其內。九子事之，以觀其外。二女嬀媽純篤，盡道九子尊虞，服勤靡懈。列女傳：二女承事舜於

猷猷之中不以天子之故而驕盈怠嫚猶謙謙恭儉思盡婦
道瞽瞍使舜塗廩舜告二女二女曰往哉舜既治廩乃捐階
瞽瞍焚廩舜往飛出復使舜浚井舜告二女二女曰前往哉
舜往浚井格其出入從而掩之舜潛出既不能殺舜瞽瞍又
速舜飲酒醉將殺之舜告二女二女乃與舜藥浴往遂往舜
終日飲酒不醉舜之女弟繫憐之與二女諧舜為天子娥皇
為后女英為妃舜陟方死蒼梧二妃死湘江間俗謂之湘君
禮檀弓舜葬蒼梧三妃未從疏舜長妃娥皇無子次妃女英
生商均次妃癸比生二女霄明燭光三妃後皆不從舜之葬
處博物志舜死蒼梧二女啼於洞庭以涕揮竹竹為之斑雙
峯饒氏曰百官只是百司今書司客將之類

又言一年所居成聚二年成邑三年成都是天下之士就之也

廣雅聚居也漢書音義小於鄉曰聚趙氏德曰聚謂村落周
禮四井為邑四邑為丘四丘為甸四甸為縣四縣為都莊子
舜三徙成都至釗之墟十五萬家

胥相視也遷之移以與之也如窮人之無所歸言其怨慕迫切
之甚也

天下之士悅之人之所欲也而不足以解憂好色人之所欲妻帝之二女而不足以解憂富人之所欲富有天下而不足以解憂貴人之所欲貴爲天子而不足以解憂人悅之好色富貴無足以解憂者惟順於父母可以解憂

孟子推舜之心如此以解上文之意極天下之欲不足以解憂而惟順於父母可以解憂孟子真知舜之心哉

人少則慕父母知好色則慕少艾有妻子則慕妻子仕則慕君不得於君則熱中大孝終身慕父母五十而慕者予於大舜見之矣

少好皆去聲

言常人之情因物有遷

書君陳惟民生厚因物有遷

惟聖人爲能不失其本

心也艾美好也楚辭戰國策所謂幼艾義與此同

楚辭怨長劍今擁幼艾孫獨立兮爲民正戰國趙策建信君
貴於趙公子魏牟曰爲冠而敗之奚虧於王之國而王必待
工而後乃使之今爲天下之工或非也社稷爲墟戾先王不
血食而王不以予工乃予幼艾後漢班孟堅曰始楚賢臣屈
原被讒放流作離騷諸賦以自傷悼後有宋玉唐勒之屬慕
而述之漢興吳王濞招致天下娛遊子弟枚乘鄒陽嚴夫子
之徒興於文景之際而淮南王安亦招賓客著書故世傳楚
辭校書郎王逸曰屈原懷忠貞之性而被讒邪傷君閤蔽國
將危亡乃援天地之數列人形之要而作九歌九章以諷諫
懷王宋玉者屈原弟子也憫惜其師忠而放逐故作九辯以
述其志至於漢興劉向王褒之徒咸悲其文依而作辭故號
爲楚辭亦承其九以立義焉今按楚辭共十七卷離騷九歌
天問九章遠遊卜居漁父七卷屈原作九辯招魂二卷宋玉
作大招一卷或云景差作惜誓一卷賈誼作招隱士一卷淮
南小山作七諫一卷東方朔作哀時命一卷嚴忌作九
懷一卷王褒作九歎一卷劉向作九思一卷王逸作九

不得失意也熱中躁急心熱也言五十者舜攝政時年五十也

按書舜典三十徵庸三十在位蓋舜生三十年堯方召用歷
試三年居攝二十八年通三十年凡六十歲而始卽帝位則
五十正攝位時也

五十而慕則其終身慕可知矣

此章言舜不以得衆人之所欲爲己樂而以不順乎親之心爲己憂非聖人之盡性其孰能之

萬章問曰詩云娶妻如之何必告父母信斯言也宜莫如舜舜之不告而娶何也孟子曰告則不得娶男女居室人之大倫也如告則廢人之大倫以懟父母是以不告也

懟直類反

詩齊國風南山之篇也

小序刺齊襄公也鳥獸之行淫乎其妹大夫遇是惡作詩而去之宋子集註此刺襄公居高位而行邪行

信誠也誠如此詩之言也懟讎怨也舜父頑母嚚常欲害舜

書堯典瞽子父頑母嚚左傳口不道忠信之言爲嚚心不則德義之經爲頑

告則不聽其娶是廢人之大倫以讎怨於父母也

萬章曰舜之不告而娶則吾既得聞命矣帝之妻舜而不告何也

曰帝亦知告焉則不得妻也

妻去聲

以女爲人妻曰妻程子曰堯妻舜而不告者以君治之而已如今之官府治民之私者亦多

萬章曰父母使舜完廩捐階瞽瞍焚廩使浚井出從而揜之象曰謨蓋都君咸我績牛羊父母倉廩父母干戈朕琴朕張朕二嫂使治朕棲象往入舜宮舜在牀琴象曰鬱陶思君爾忤忤舜曰惟茲臣庶汝其于予治不識舜不知象之將殺已與曰奚而不知也象憂亦憂象喜亦喜

張都禮反忤女六反忤音尼與平聲

完治也捐去也階梯也揜蓋也按史記曰使舜上塗廩瞽瞍從下縱火焚廩舜乃以兩笠自捍而下去得不死後又使舜浚井

舜穿井爲匿空旁出舜既入深瞽瞍與象共下土實井舜從匿空中出去卽其事也

史記舜本紀舜父瞽叟頑母嚚弟象傲皆欲殺舜舜順適不失子道兄弟孝慈欲殺不可得卽求常在側舜年二十以孝聞三十而帝堯問可用四嶽咸薦虞舜曰可於是堯乃以二女妻舜以觀其內使九男與處以觀其外舜居媯汭內行彌謹堯二女不敢以貴驕事舜親戚甚有婦道堯九男皆益篤舜耕歷山歷山之人皆讓畔漁雷澤雷澤上人皆讓居陶河濱河濱器皆不苦窳一年而所居成聚二年成邑三年成都堯乃賜舜絺衣與琴爲築倉廩子牛羊瞽叟尚復欲殺之使舜上塗廩瞽叟又使舜穿井舜穿井爲匿空旁出舜既入深瞽不死後瞽叟又使舜穿井舜穿井爲匿空旁出舜既入深瞽叟與象共下土實井舜從匿空出去瞽叟象喜以舜爲已死象曰本謀者象象與其父母分於是曰舜妻堯二女與琴象取之牛羊倉廩子父母象乃止舜宮居鼓其琴舜往見之象愕不懌曰我思舜正鬱陶舜曰然爾其庶矣舜復事瞽叟愛弟彌謹海篇簞笠以竹爲之無柄曰簞詩小雅何簞何笠傳笠所以禦暑左傳註兵車無蓋邊人執笠依轂而立以禦寒暑名曰笠轂括地志舜井在媯州懷戎縣西外城中其西又有一井耆舊相傳並舜井也帝王紀河東有舜井

樂史偃師西北二十五里有舜井杜預曰魯國卞縣宛可有姚墟世謂之陶墟舜所生處也井曰舜井水經注歷城縣城南封山山上有舜祠山下有大穴謂之舜井路史池之建德縣北二十里有舜井按記傳所載舜井非一未詳孰是

象舜異母弟也

史記舜父瞽叟盲而舜母死更娶妻而生象

謨謀也蓋蓋井也舜所居三年成都故謂之都君咸皆也績功也舜既入井象不知舜已出欲以殺舜為己功也干盾也戈戟也琴舜所彈五絃琴也

禮樂記舜作五絃之琴以歌南風夔始制樂以賞諸侯通鑑帝恭己無為彈五絃之琴歌南風之詩

張珣弓也

人物考珣弓漆赤弓尚書彤弓是也天子曰彤弓堯禪舜天下故賜之彤弓也

象欲以舜之牛羊倉廩與父母而自取此物也二嫂堯二女也

棲牀也

釋名牀裝也所以自裝載也廣雅棲謂之牀說文牀身之安也第牀簀也杠床前木也服虔通俗文牀三尺五曰榻板獨坐曰秤八尺曰牀物原神農作牀周禮王府掌王之牀第

象欲使爲己妻也象往舜宮欲分取所有見舜生在牀彈琴蓋既出卽潛歸其宮也鬱陶思之甚而氣不得伸也象言己思君之甚故來見耳忸怩慙色也臣庶謂其百官也象素憎舜不至其宮故舜見其來而喜使之治其臣庶也孟子言舜非不知其將殺已但見其憂則憂見其喜則喜兄弟之情自有所不能已耳萬章所言其有無不可知然舜之心則孟子有以知之矣他亦不足辯也程子曰象憂亦憂象喜亦喜人情天理於是爲至曰然則舜僞喜者與曰否昔者有饋生魚於鄭子產子產使校人

畜之池校人烹之反命曰始舍之圉圉焉少則洋洋焉攸然而逝
子產曰得其所哉得其所哉校人出曰孰謂子產智子既烹而食
之曰得其所哉得其所哉故君子可欺以其方難罔以非其道彼
以愛兄之道來故誠信而喜之奚偽焉

與平聲校音效又音教畜許六反

校人主池沼小吏也

按周禮夏官有校人掌王馬之政註交木制馬出入曰校校人馬官之長無主池沼之說他書亦不載是職豈掌馬而兼主池沼與周禮內饗掌王及后世子膳羞之割烹煎和之事凡宗廟祭祀掌割烹之事外饗掌外祭祀之割烹之事邦饗耆老孤子士庶子掌割烹之事享人掌其鼎鑊以給水火之齊職內外饗之饗烹煮辨膳羞之物

圉圉困而未舒之貌洋洋則稍縱矣攸然而逝者自得而遠去也方亦道也罔蒙蔽也欺以其方謂誑之以理之所有罔以非其道謂昧之以理之所無象以愛兄之道來所謂欺之以其方

也舜本不仰其爲故實喜之何僞之有

此章又言舜遭人倫之變而不失天理之常也

萬章問曰象曰以殺舜爲事立爲天子則放之何也孟子曰封之也或曰放焉

放猶置也置之於此使不得去也萬章疑舜何不誅之孟子言舜實封之而或者誤以爲放也

萬章曰舜流其工于幽州放驩兜于崇山殺三苗于三危殛鯀于羽山四罪而天下咸服誅不仁也象至不仁封之有庠有庠之人奚罪焉仁人固如是乎在他人則誅之在弟則封之曰仁人之於弟也不藏怒焉不宿怨焉親愛之而已矣親之欲其貴也愛之欲其富也封之有庠富貴之也身爲天子弟爲匹夫可謂親愛之乎

鼻庫音

流徙也

史記堯本紀驩兜進言共工堯曰不可而試之工師共工果
淫辟四岳舉鯀治鴻水堯以爲不可岳強請試之試之而無
功故百姓不便三苗在江淮荊州數爲亂于是舜言于帝請
流共工于幽陵以變北狄放驩兜于崇山以變南蠻遷三苗
于三危以變西戎殛鯀于羽山
以變東夷四罪而天下咸服

共工官名

虞書舜典帝曰疇若予采驩兜曰都共工方鳩僝工帝曰吁
靜言庸違象恭滔天 按共工是官名書不傳其人姓名下
又有咨嗟汝共工之文蓋此共工既放故又命垂以補其缺
也左傳史克曰少皞氏有不才子毀信廢忠崇飾惡言靖譖
庸違服讒蕝慝以誣盛德天下之民謂之窮奇杜註卽共工
也神異經西北荒中有人焉人面朱鬚蛇身手足而食五
穀禽獸頑愚名曰共工荒史共工氏伏羲時之諸侯也始國
於康厥名曰回是爲康回滅德亂常乃以浮游爲卿自謂水
德擁防百川墮高堙卑媯皇氏禽而獲之列子共工氏與顓
頊爭爲帝不得怒而觸不周之山折天柱絕地維故天傾西

北地不滿東南按此非堯時之共工姑備載以資博
物路史國名紀康地在宏農虞時共工或云居此

驩兜人名

左傳帝鴻氏有不才子掩義陰賊好行凶德醜類惡物頑嚚
不友是為比周天下之民謂之渾沌杜註即驩兜也荒史初
帝鴻庶子縉雲氏娶土敬氏曰炎融遺腹子生驩兜帝顓頊
封之是謂驩兜之國驩兜以狐功為嬖臣佞而貪賄恃寵專
權帝摯在位驩兜為司徒掩義隱賊好行惡慝堯放之於崇
山神異經南方荒中有人焉人面鳥喙而有翼兩手足扶翼
而行食海魚為人狠惡不畏
風雨獸犯死乃休名曰驩兜

二人比周相與為黨

按書載驩兜薦舉共工則
二人之比周為黨可知

三苗國名負固不服殺殺其君也

書舜典庶績咸熙分北三苗大禹謨帝曰咨禹惟時有苗弗
率汝徂征禹乃會羣后誓于師曰蠢茲有苗昏迷不恭侮慢
自賢反道敗德君子在野小人在位民棄不保天降之咎左
傳縉雲氏有不才子貪于飲食冒于貨賄侵欲崇侈不可盈

厭聚歛猜實不知紀極不分派寡不恤窮賈天下之民謂之
饕餮杜註卽三苗也戰國策昔者三苗之居左有彭蠡之波
右有洞庭之水汶水在其南衡山在其北恃此險也爲政不
善而禹放逐之神異經西方荒中有人焉面目手足皆人形
而胫下有翼不能飛爲人饕餮淫逸無理名曰苗民史記正
義吳起曰三苗之國左洞庭而右彭蠡今江州鄂州岳州也
地理今釋三苗今湖廣武昌
岳州二府江西九江府地

殛誅也縣禹父名方命圯族治水無功皆不仁之人也

書舜典帝曰咨四岳湯湯洪水方割蕩蕩懷山襄陵浩浩滔
天下民其咨有能俾乂兪曰於鯀哉帝曰吁咈哉方命圯族
岳曰異哉試可乃已帝曰往欽哉九載績用弗成左傳顓頊
氏有不才子不可教訓不知話言告之則頑舍之則鬻傲狠
明德以亂天常天下之民謂之檮杌杜註卽鯀也按史記
及漢書律歷志鯀字熙又顓頊五代孫也仕堯封於崇謂之
崇伯堯時洪水滔天求能治水者羣臣皆曰鯀可堯曰鯀性
狠利違負教令毀敗善類不可用也四岳曰等之羣臣未有
如鯀者于是竟用鯀治水九年而水不息班用不成舜攝行
天子之政巡狩行視鯀之治水無狀乃殛鯀于羽山鯀投于
羽淵化爲黃熊因爲羽淵之神神異經東方有人焉人形
而身多毛自解水土知通塞爲人自用欲爲欲息名曰鯀